

南
北
史
合
注

欽定四庫全書

南北史合注卷九十九

明·李清撰

北史十三

桓帝惟后

文帝封后

平文王后

昭成慕容后

獻明賀后

欽定四庫全書

南北史合注
卷九十九

道武慕容后

劉后

明元姚后

杜后

太武赫連后

賀后

景穆郁久闍后

文成李后

馮后別見

獻文李后

孝文林后

孝文前馮后

後馮后

高后

宣武于后

高后

胡后別見

孝明胡后

孝莊母李后

孝莊爾朱后

節閔母王太妃

節閔爾朱后

孝武嫡母馮后

生母李太妃

孝武高后

文帝母楊后

文帝乙弗后

郁久閔后

廢帝宇文后別見

恭帝若干后

孝靜母胡后

孝靜高后

漢因秦制帝之祖母曰太皇太后母曰皇太后妃曰皇

后餘則多稱夫人隨世增損非如周禮有夫人嬪婦御
妻之數焉魏晉相因時有升降前史言之具矣魏氏王
業之兆雖始於神元然自昭成之前未具言六宮之典
而章平思昭穆惠煬烈八帝妃后無闕道武追尊祖妣
皆從帝謚為皇后始立中宮餘妾或稱夫人多少無限
然皆有品次太武稍增左右昭儀及貴人椒房等後庭
漸多矣又魏故事將立皇后必令手鑄金人以成者為
吉不則不得立也又太武文成保母劬勞之恩並極尊

崇之義雖事乖典禮而觀過知仁孝文改定內官左右
昭儀位視大司馬三夫人視三公三嬪視三卿六嬪視
六卿世婦視中大夫御女視元士後置女職以典內司
尚書書令僕作司大監女侍中三宮視二品監女尚書
美人女史女賢人女書史書女小書女五官視三品中
才人供人中使女生才人恭使宮人視四品青衣女酒
女饗女食奚官女奴視五品及齊神武文襄俱未踐尊
極神武嫡妻稱妃其所聘柔然女稱為柔然公主文襄

既尚魏朝公主故無別號兩宮自餘姬侍並稱娘而已
文宣後庭雖有夫人嬪御之稱然未具員數孝昭內職
甚少唯楊嬪才貌兼美復是貴家襄城王母桑氏有德
行並蒙恩禮其餘無聞焉河清新令內命婦依古制有
三夫人九嬪二十七世婦八十一御女又準漢制置昭
儀有左右二人比丞相其弘德正德崇德為三夫人比
三公光猷昭訓隆徽為上嬪比三卿宣徽凝暉宣明順
華凝華光訓為下嬪比六卿正華令則修訓曜儀明淑

芳華敬婉昭華光正昭寧貞範弘徽和德弘猷茂光明
信靜訓曜德廣訓暉範敬訓芳猷婉華明範艷儀暉則
敬信為二十七世婦比從三品穆光茂德貞懿曜光貞
凝光範令儀內範穆閨婉德明婉艷婉妙範暉章敬茂
靜肅瓊章穆華慎儀妙儀明懿崇明麗則婉儀彭媛修
閑修靜弘慎艷光漪容徽淑秀儀芳婉貞慎明艷真穆
修範肅容茂儀英淑弘艷正信凝婉英範懷順修媛良
則瑤章訓成潤儀寧訓淑懿柔則穆儀修禮昭慎貞媛

肅閨敬順柔華昭順敬寧明訓弘儀崇敬修敬承閑昭容麗儀閑華思柔媛光懷德良媛淑猗茂範良信艷華徽娥肅儀妙則爲八十一御女比正四品武成好內並具其員自外又置才人采女以爲散號後主既立二后昭儀以下皆倍其數又置左右娥英比左右丞相降昭儀比二大夫尋又置淑妃一人比相國周氏率由姬制內職有序文帝創基修衽席以儉約武皇嗣歷節情欲於矯枉宮闈有貫魚之美戚里無私溺之尤可謂得君

人之體宣皇外行其志內逞其欲溪壑難滿采擇無厭
恩之所加莫限廝阜榮之所及無隔險詖於是升蘭殿
以正位踐椒庭而齊體者非一人焉階房帷而拖青紫
緣恩幸而擁玉帛非一族焉雖辛癸之荒淫趙李之傾
惑曾未足比其髣髴也人厭苛政弊事實多文帝之祀
忽諸特由於此隋文思革前弊大矯其違唯皇后當室
傍無私寵婦官位疏未詳備焉開皇二年著內官之式
略依周禮省減其數嬪三員掌教四德視正三品世婦

九員掌賓客祭祀視正五品女御三十八員掌女功絲
枲視正七品又采漢晉舊儀置六尚六司六典述相統
攝以掌宮掖之政一曰尚宮掌導引皇后及閨閣稟賜
管司令三人掌圖籍法式糾察宣奏典琮三人掌琮璽
器玩一曰尚儀掌禮義教學管司樂三人掌音律之事
典贊三人掌導引內外命婦朝見三曰尚服掌服章寶
藏管司飾三人掌簪珥花嚴典櫛三人掌巾櫛膏沐四
曰尚食掌進饌先嘗管司醫三人掌方藥卜筮典器三

人掌鑄彝器皿五曰尚寢掌帷帳牀褥管司筵三人掌
鋪設灑掃典執三人掌扇傘燈燭六曰尚工掌營造百
役管司製三人掌衣服裁縫典會三人掌財帛出入六
尚各三員視從九品六司視勲品六典視流外二品初
文獻皇后功參厯試外預朝政內擅宮闈懷嫉妬之心
虛嬪妾之位不設三妃防其上逼自嬪以下置六十員
加又抑損服章降其品秩至太獻崩後始置貴人三員
增嬪至九員世婦二十七員御女八十一員貴人等闈

掌宮闈之務六尚以下皆分隸焉煬帝時后妃嬪御無
釐婦職唯端容麗飾陪從宴遊而已帝又參詳典故自
製嘉名著之於令貴妃淑妃德妃是為三夫人品正第
一順儀順容順華修儀修容修華充儀充容充華是為
九嬪品正第二婕妤一十二員品正第三美人才人一
十五員品正第四是為世婦寶林二十員品正第五御
女二十四員品正第六采女三十七員品正第七是為
女御總一百二十以叙於宴寢又有承衣刀人皆趨侍

左右並無負數視六品以下時又增置女官準尚書省
以六局管二十四司一曰尚宮局管司言掌宣傳奏啟
司簿掌名錄計度司正掌格式推罰司闈掌門閣管籥
二曰尚儀局司籍掌經史教學紙筆几案司樂掌音律
司賓掌賓客司贊掌禮儀贊相導引三曰尚服局管司
璽掌琮璽符節司衣掌衣服司飾掌湯沐巾櫛玩弄司
仗掌仗衛戎器四曰尚食局管司膳掌膳羞司醞掌酒
醴醢醢司藥掌醫巫藥劑司饗掌原饌柴炭五曰尚寢

局管司設掌牀席帷帳鋪設灑掃司輿掌輿輦傘扇執持羽儀司苑掌園籩種植蔬菜瓜果司燈掌火燭六曰尚工局管司製掌營造裁縫司寶掌金玉珠璣錢貨司綵掌繒帛司織掌織染六尚二十二司員各二人唯司樂司膳員各四人每司又置典及掌以貳其職六尚十人從第五司二十八人品從第六典二十八人品從第七掌二十八人品從第九女史流外量局閑劇多者十人以下無定員數聯事分職各有司存焉

魏神元皇后竇氏

魏書官氏志曰代北內入諸姓紇豆陵氏孝文改竇氏魏收皆從其後改者以就簡便餘倣此

沒鹿回部大人賓之女賓臨終誠其二子速侯回題令善事神元及賓卒速侯等欲因神元會喪為變語泄神元聞之晨起以佩刀殺后馳使告速侯等言后暴殂速侯等來赴因執殺之

文帝皇后封氏

內入諸姓是賁氏孝文改封氏

生桓揚二帝早崩桓帝立乃葬焉文成初穿天泉池獲一石銘稱桓帝葬母氏遠近赴會二十餘萬有司以聞命藏之太廟次妃蘭氏是生思帝

桓皇后惟氏生三子長曰普根次惠帝次煬帝平文殂后攝國事時謂女國后性猛忌平文之殂后所為也

平文皇后王氏廣寧人年十三因事入宮得幸於平文生昭成帝平文殂昭成在襁褓時國有內難將害帝子

后匿帝袴中，呪曰：「若天祚未終，汝無聲，遂良久不啼，得免於難。」昭成初，欲定都湟源川，築城郭，起宮室，議不決。后曰：「國自上世遷徙，為業今事難，後基業未固，若郭而居，一旦寇來，難卒遷動，乃止。」烈帝之崩，國祚殆危，興復大業，后之力也。殂葬雲中金陵道武，即位配饗太廟。昭成皇后慕容氏慕容皝之女，初帝納皝妹為妃，未幾，殂。昭成復請繼好。

本史作「請繼好」，皆飾詞，今正之。

遣大人長孫秩逆后既送於境上后至有寵生獻明帝
及秦明王后性聰敏多智專夕理內每事多從初昭成
遣衛辰兄悉勿祈還部落后誠之曰汝還必深防衛辰
辰姦搢終當滅汝悉勿祈死其子果為衛辰所殺卒如
后言建國二十三年殂道武即位配饗太廟

獻明皇后賀氏

內入諸姓賀賴氏又北方有賀蘭氏文俱改賀氏

東部大人野干女少以容儀選入東宮生道武苻洛內

侮后與道武及故臣吏避難北徙俄高車來抄掠后乘車避賊而南中路失道乃仰天曰國家崩胄豈至爾絕惟神扶助遂馳輪王不傾行百餘里至七個山南免難後劉顯使人將害帝帝姑為顯弟允渥妻知之密告后梁眷亦來告難后乃令帝去之后夜飲顯醉向晨故驚廡中群馬使起視馬后泣謂曰吾諸子始皆在此今盡亡失汝等誰殺之故顯使不急追道武得至賀蘭部羣情未甚歸附后從弟外朝大人悅舉部隨從供奉盡禮

顯怒將害后后奔亢渥家匿神車中三日亢渥舉室請
救乃得免會顯部亂始得亡歸后后弟染干忌道武得
人心舉兵圍通行宮后出謂染干曰汝等今安所置我
而欲殺吾子染干慙而去後后少子秦王觚使于燕慕
容重止之后以觚不反憂念寢疾皇后始元年殂祔葬
于盛樂金陵後追加尊謚配饗焉

道武皇后慕容氏寶之季女中山平入充掖庭得幸左
丞相衛王儀等奏請立皇后帝從儀言令后鑄金人成

乃立之封后母孟為漂陽君後崩

道武宣穆皇后劉氏劉眷女登國初納為夫人生華陰
公主後生明元后專理內事寵待有加以鑄金人不成
故不登后位魏故事後宮產子將為儲貳其母皆賜死
愚按史言魏故事誤辨見文成李后傳中

道武末年后以舊法堯明元即位追尊謚位配饗太廟
自此後宮人為帝母皆正配饗

魏書禮志載太常少卿元端奏云道武配園丘道武

劉后配方澤

明元昭哀皇后姚氏姚興女西平長公主也明元以后禮納之後為夫人

太平廣記曰夫人悲思故國帝因造白樓登望飾以鉛粉號馬邑白樓

后因鑄金人不成未升尊位然帝寵禮如后泰常五年堯帝追恨之贈皇后璽綬而加謚葬雲中金陵

明元密皇后杜氏魏郡鄴人陽平王超之妹初以良家

子選入太子宫有寵生太武及明元即位拜貴嬪

魏不殺太子母一見

恭帝五年堯謚曰密貴嬪葬雲中金陵太武即位追尊
號謚配饗太廟

魏書禮志載元端表曰明元配上帝明密杜后配地
祇愚按道武以慕容為正后太武以赫連為正后乃
不皆不配方澤地祇而配嗣君生母非禮也

又立廟于鄴刺史四時薦祀以魏郡太后所生之邑復

其調役後甘露降于廟庭文成時相州刺史高閭表修
后廟詔曰婦人外成理無獨祀陰必配陽以成天地未
聞有萃之國立太妣之饗此乃先皇所立一時之至感
非經世之遠制便可罷祀先是太武保母竇氏初以夫
家生事誅與二女俱入官操行純備進退以禮明元命
為太武保母性仁慈帝感其恩訓奉養不異所生及即
位尊為保太后後尊為皇太后封其弟漏頭為遼東王
太后訓釐內外甚有聲稱性恬素寡欲喜怒不形於色

好揚善隱惡帝征涼州柔然吳提入寇太后命諸將擊走之其君元年殂詔天下大臨三日太保盧魯元監護喪事謚曰惠葬崞山從后意也初后嘗登崞山顧謂左右曰吾母養帝躬敬神受人若死而不滅必不為賤鬼然於先朝本無位次不可違禮以從園陵此山之上可以終託故葬焉別位后寢廟於崞山建碑頌德

太武皇后赫連氏勃勃女也太武平統萬納后及二妹俱為貴人後立為皇后文成初崩祔葬金陵

太武敬哀皇后賀氏代人初為夫人生景穆

魏不殺太子母二見

神龜元年薨追贈貴嬪葬雲中金陵後追號尊謚配饗
太廟后少孤無父兄僅爵其從父遠為長鄉子卒贈光
祿大夫五原公

景穆恭皇后閭氏

愚按高宗本紀作皇妣閭氏今此傳又作郁久閭氏
從本姓也刪之

河東王毗妹少以才選入東宮有寵生文成

魏不殺太子母三見

文成即位未及上尊號崩追尊號謚葬雲中金陵配饗太廟又文成乳母常氏本遼西人因事入宮乳帝有劬勞保護之功文成即位尊為保太后尋尊為皇太后告於郊廟和平元年殂詔天下大臨三日謚曰昭葬於廣寧唐斧山俗謂之鳴雞山太后遺志也依惠太后故事

別立寢廟置守陵二百家樹碑頌德

文成皇后李氏梁國蒙縣人母頓丘王峻之妹后初生有異於常父方叔恒言此女當大貴及長姿質美麗太武南征永昌王仁出壽春軍至后宅因得后及仁鎮長安遇事誅后與其家人送平城宮文成登白樓望見美之乃下臺后得幸於齊庫中遂有娠常太后後問后知之時守庫者亦私記於壁別加驗問皆符及生獻文拜貴人太安二年太后依故事

愚按道武殺明元生母亦偶行之耳自後太武景穆

文成三母皆以天年終惟馮后甫立即賜獻文生母
李貴人死不過如東漢竇后欲專外家名耳今依故
事者馮后辭也細觀諸傳自見史緣而筆之誤予友
朱昭芑大以為然已補入史糾矣

今后具條記在南兄弟及引所結宗兄洪之悉以付託
臨訣每一稱兄弟拊膺慟泣遂薨後謚曰元皇后葬金
陵配饗太廟

獻文思皇后李氏中山安喜人南郡王惠女姿德婉淑

年十八以選入東宮獻文即位為夫人生孝文帝皇興三年薨葬金陵承明元年追崇號謚配饗太廟

孝文貞皇后林氏平原人父勝位平涼太守叔父金閭起自閹官獻文初為定州刺史為乙渾所誅及勝兄弟皆死勝無子有二女入掖庭后容色美麗得幸於孝文生皇子恂以恂將為儲貳太和七年依舊制薨帝仁恕不欲襲前事而稟文明太后意故不果行謚曰貞后葬金陵及恂以罪賜死有司奏追廢后為庶人

孝文廢后馮氏太師熙之女太和十七年孝文既終喪
太尉元丕等表以長秋未建六宮無主請正內位孝文
從之立后為皇后恩意甚厚

魏書曰孝文每遵典禮后及夫嬪以下妾御皆以次
進

孝文後重引后姊昭儀至洛稍有寵后禮受漸哀昭儀
自以年長且前入宮掖表見侍念輕后不率妾禮后雖
不妬時有愧恨之色昭儀規為內主譖構百端尋廢后

為庶人后貞謹有德操遂為練行尼後終於瑤光佛寺
孝文幽皇后亦熙女母曰常氏本賤微得幸於熙熙元
妃公主薨後遂主家事生后與北平公夙文明太皇太
后欲家世貴寵乃簡熙二女俱入掖庭時年十四其一
卒后有姿媚偏見愛幸未幾疾太后遣還家為尼帝猶
留念焉歲餘太后崩帝服終頗存訪之又聞后素疹痊
除遣閹官雙三念璽書勞問遂迎赴洛陽及至寵愛過
本初專寢當夕宮人稀進拜左昭儀後立為皇后始后

以疾歸頗聞失德及帝頻歲南征后遂與中官高菩薩
私亂及帝在汝南不豫后便公然醜恣中常侍雙蒙等
為其心腹是時彭城主公宋王劉昶之子婦也年少廢
居北平公夙后同母弟后為求婚於孝文孝文許之主
不願后欲強之婚有日矣主密與侍婢及僮十餘人乘
輕車冒霖雨赴懸瓠奉謁孝文自陳本意因言后與菩
薩亂狀帝駭愕未信祕匿之

魏書曰惟彭城王勰侍疾左右具知其事

此後后漸憂懼與母常氏求託女巫禱厭孝文疾不起
一旦得如文明太后輔少主賞報不貲又取三牲宮中
祆祠假言祈福專為左道常氏或自詣宮中或遣侍婢
與相報答帝至洛執問菩薩雙蒙等具得情狀帝以疾
卧舍温室夜引后并列菩薩等於戶外后臨入令搜衣
中有寸及便斬后頓首泣謝乃賜坐東楹去御筵二丈
餘孝文令菩薩等陳狀又讓后曰汝有妖術可具言之
后乞屏左右密陳孝文教中常侍悉出唯長秋卿白整

在側取衛直刀拄之后猶不言孝文乃以綿堅塞整耳
自小語再三呼整無所應乃令后言之事隱人莫知也
高祖喚彭城北海二王令入坐言昔是汝嫂今便他人
但入勿避又曰此老嫗欲白及挿我肋上可窮問本末
勿有所難又云馮家女不能復相廢遂且使在宮中空
坐有心乃能自死勿謂吾猶有情也帝素至孝猶以文
明太后故未行廢二王出乃賜后死訣后再拜稽首涕
泣及入宮後帝命中官有問於后后罵曰我天子婦當

而對豈令汝傳也帝怒勅后母常氏入示以后狀常撻
之百餘乃止帝尋南伐后留京師雖以罪失寵而夫人
嬪妾奉之如法惟宣武在東宮令無朝謁帝疾甚謂彭
城王勰曰後宮久乖陰德自絕於天吾死後可賜自盡
別宮葬以后禮庶掩馮門大過帝崩梓宮達魯陽乃行
遺詔北海王詳宣遺旨長秋卿白整等入授后藥后走
呼不肯引訣曰官豈有此是諸王輩殺我耳整等執持
強之乃含椒而盡梓宮次洛南咸陽王禧等知審死相

視曰若無遺詔我兄弟亦當作計去之豈可令失行婦人宰制天下殺我輩也謚曰幽皇后葬長陵塋內

孝文文昭皇后高氏

內入諸姓有是樓氏孝文改高氏

司徒公肇妹父聰母蓋氏凡四男二女皆生於東齊孝文初乃舉室西歸近龍城鎮鎮表后德色婉艷及至文明太后親幸北部曹見后奇之入掖庭時年十三初后幼曾夢在堂內立日光自窻中照之灼灼而熱后東西

金史卷之八十一
卷九十九
避之光猶斜照不已如是數夕怪之以白其父颺颺以
問遼東人閔宗宗曰此奇徵也

魏書載宗言曰光照女身必有恩命女避猶照者主
上來求女不獲已也

昔有夢月入懷猶生天子况日照之徵此女將被帝命
誕育人君象也後生宣武及廣平王懷樂安公主時馮
幽后為昭儀寵盛密有母養帝心后自代如洛陽暴薨
於汲郡之共縣或云昭儀所賊也宣武為皇太子二日

一朝幽后后拊念慈愛有加孝文出征宣武入朝必久
留後宮親視櫛沐母道隆備後有司奏請加號謚曰文
昭貴人孝文從之宣武踐祚追尊配饗后先葬長陵東
南陵制卑局因就起山陵號終寧陵置邑戶五百家孝
明時更上尊號曰太后

魏書載詔曰文昭皇太后作合高祖實誕英聖而夙
世淪暉孤莖弗祔先帝孝感自東遷奉未遂永言哀
恨義結幽明可遠令遠奉更上尊號稱太皇太后觀

此則本史止言太后誤

以同漢晉之典正姑婦之禮廟號如舊遷靈櫬於長陵
北內西北六十步初開終寧陵數丈於梓宮上獲大地
長丈餘黑色頭有王字蟄而不動靈櫬既遷還置地舊
處

宣武順皇后于氏

內入諸姓勿怛于氏孝文改于氏新唐書又作萬怛
于未知孰是

太尉烈弟勳女宣武始親政事烈時為領軍總心膺之
任以嬪御未備因左右稱后有容德乃迎為貴人時年
十四甚見寵愛立為皇后后靜默寬容性不妬生皇子
三歲天後暴崩宮禁事秘莫能知悉而世議歸咎高夫
人葬永泰陵謚曰順皇后

宣武皇后高氏文昭皇后弟優女為貴嬪生皇子早夭
又生建德公主後拜為皇后甚見禮性妬宮人希御及
明帝即位上尊號曰皇太后尋為尼居瑤光寺非大節

慶不入宮時建德公主始五六歲靈太后出覲母武邑君值天文有變欲以當禍是夜暴崩天下寃之喪還瑤光佛寺殯皆以尼禮

魏書禮志曰太后既以尼崩肅宗特詔為齋哀三月以申追仰有司奏案故事皇太后崩自復魂斂葬百官哭臨禮甚多今尼太后委尊居道不依配極之典但孝經義成君臣理無廢絕內外羣臣權改常服單衣邪巾奉送至墓列位哭拜事訖而除止在京師更

不宣下詔可

初孝文幽后寵欲專其愛後宮接御多見阻過孝文每言於近臣稱婦人妬防雖王者不能免况士庶乎宣武高后悍忌嬪御或至帝崩不蒙侍接由是在洛二十餘年皇太子育者唯孝明而已

孝明皇后胡氏靈太后從兄冀州刺史盛之女靈太后欲榮重門族故立為皇后明帝頗有酒德專嬖充華潘氏后及嬪御並無過寵太后為帝選納抑屈人流時博

陵崔孝芬范陽盧道約隴西李瓚等女俱為世婦諸人
訢訟咸見忿責武泰初后既入道遂居瑤光寺

孝莊母文景皇后李氏趙郡人彭城王勰妃生孝莊
永安二年追加勰帝號贈妃為文景皇后

孝莊皇后爾朱氏榮之女先為孝明嬪及榮立孝莊欲
帝立為后帝不得已從之后性妬屢致忿恚榮誅後乃
誕皇子帝遇弒皇子亦被撲殺遷鄴後高歡納為別室
敬重踰妻妃見必束帶自稱下官歡迎柔然公主還妃

迎於木井北與公主前後別行不相見公主引角弓仰射翔鶴應弦而落妃引長弓斜射飛鳥亦一發中歡喜曰我此二婦並堪擊賊後為尼歡為起佛寺天保初為太妃及文宣狂酒將無禮於太妃太妃不從遂遇禍

節閔母先太妃王氏廣陵王羽妃生節閔普泰元年加羽先帝號贈妃為太妃

節閔爾朱后兆之女

愚按西魏文帝罪高歡詔言其取普泰皇后列在私

房而北傳內亦言節閔納北女為后本史作建明后
乃普泰之誤今正之

帝遇廢弒高歡納之生任城王浟未幾與趙郡公琛私
通伏靈州後適范陽盧景璋

孝武嫡母武穆皇后馮氏廣平王懷妃永熙二年加
懷帝號贈妃為武穆皇后又贈生母李氏為皇太妃
孝武皇后高氏渤海王歡長女帝見立納為后及帝幸
關西降為彭城王韶妃

文景皇后楊氏弘農人京兆王愉妃生文帝大統元年加愉帝號贈妃為文景皇后帝舅騰位開府儀同三司卒贈司空謚貞襄

文帝文皇后乙弗氏

魏書官志內入諸姓乙弗氏孝文改乙氏至文帝復舊

河南洛陽人先世為吐谷渾渠帥居青海號青海王涼州平后高祖莫瓌擁部落入附拜定州刺史封西平公

自莫瓌後三世尚公主女多為王妃甚見貴重父瓌儀
同三司充州刺史母淮陽長公主乃孝文第四女后美
容儀少言笑年數歲父母異之指示諸親曰生女何妨
若此實勝男年十六文帝納為妃及即位以大統元年
冊為皇后后性好節儉蔬食故衣珠玉羅綺絕於服玩
又仁恕不妬帝益重之生男女十二人多早夭唯太子
及武都王戊存

愚按本史別傳又作宜都王式

時新都關中務欲東討柔然寇邊未遑北伐故帝結婚
撫之於是更納悼后命后遷居別宮出家為尼悼后猶
懷猜忌復徙后居秦州依子秦州刺史武都王帝雖限
大計恩好不忘後密令養髮有追還意然事祕外無知
者六年春柔然舉國度河前驅以過夏州或言虜為后
尚存興此役帝曰豈有百萬之衆為一女子舉也然致
此物論朕亦何顏見將師乃遣中常侍曹寵貴手敕令
后自盡后奉敕揮泪謂寵曰願至尊享千萬歲天下康

寧死無恨也。因命武都王前與訣，遺語皇太子辭皆悽愴。因慟哭久之。侍衛咸垂涕失聲，莫能仰視。召僧設供，令侍婢數十人出家，手為落髮。事畢入室，引被自覆。崩年三十一。鑿麥崖為龕，葬之。柩將入，有二叢雲先入龕中，頃之一滅。一出後，號寂陵。及文帝山陵畢，有手書云：萬歲後欲令后配饗公卿，乃議追諡文皇后，祔太廟。廢帝時，合葬永陵。后兄繪封魏昌縣公，又為吏部尚書。文帝悼皇后郁久閭氏。

文帝詔代人改姓者復舊故又從郁久閭

柔然主阿那瓌長女容貌端嚴夙有成智大統初柔然
屢犯北邊帝乃與約通好結婚命扶風王孚往迎柔然
俗以東爲貴后營幕戶席皆東向車七百乘馬萬疋駢
千頭及到黑鹽池魏朝鹵簿文物始至孚奏請正南面
后曰我未見魏主故柔然女也魏仗向南我自東面孚
無以對四年正月至京師立爲皇后時年十四六年后
懷孕將產居瑤華殿間上有犬吠聲惡之又見婦人盛

飾至后所后謂左右此為何人醫巫傍侍悉無見者時謂文后之靈產訖崩年十六葬少陵原十七年合葬永陵當會橫橋北后梓宮先至鹿苑帝輜輶後來將就次所執折不進

恭帝皇后若干氏

內入諸姓若干氏孝文改苟氏西魏復舊

司空長樂正公惠之女有容色恭帝納為妃及即位立為皇后後出家為尼在佛寺殂竟無謚

孝靜母胡妃安定臨涇人清河王亶妃生孝靜及即位丞相歡以奉孝明後為辭亶與妃皆無尊稱

孝靜皇后高氏歡第二女天平四年詔聘為皇后歡前後固辭不許與和初詔司徒孫騰司空襄城王昶等奉詔致禮以後駕迎於晉陽丞相第五月立為皇后大赦齊受禪降為中山王妃

此本史誤與魏文帝降漢曹后為山陽公夫人不同彼系漢而此遠魏也合作改封太原公主

帝過殺出俗為尼後改降尚書左僕射楊愔

南北史合注卷九十九

欽定四庫全書

南北史合注卷一百

明 李清 撰

列傳第二

北史十四

后妃下

齊神武妻后

柔然郁久闍公主 韓太妃 鄭太妃 游太妃 馮娘 李娘 附

文襄元后

琅琊公主 附

文宣李后

段昭儀 王嬪 薛嬪 附 廢帝李后

孝昭元后

武成胡后 李夫人附

後主斛律后

胡后

穆后 馮淑妃附

周文元后

叱奴后

孝閔元后

明帝獨孤后

武帝阿史那后

李后 宣帝楊后別見

宣帝朱后

陳后

元后

尉遲后

靜帝司馬后

隋文帝獨孤后

陳夫人
蔡夫人

附煬帝蕭后

齊武明皇后婁氏諱昭君贈司徒內干之女少明悟強族多聘之不肯行及見神武城上執役驚曰此真吾夫也乃使婢通意又數致私財使聘已父母不得已許焉神武既有澄清之志傾產結英豪密謀秘策后恒參預及拜渤海王妃閭闔之事悉決焉后高明嚴斷雅遵儉約往來外舍侍從不過十人性寬厚不妬神武姬侍咸加恩待一日將出師西侵后夜嚮生一男一女左右請退告神武弗聽曰王出統大兵何得以我故輕離軍幕

死生命也來復何為神武聞之嗟嘆良久沙苑敗後任景請以精騎二萬取宇文黑獺神武悅以告后后曰得獺失景何利焉乃止神武逼於柔然欲娶其女未決后曰國家大計願不疑也及柔然主至避正室處之神武愧謝曰彼將有覺願絕勿顧慈愛諸子不異已出躬自紡織手縫戎服以帥左右弟昭以功名自達餘親屬未嘗為請爵位每言有材當用私不亂公文襄嗣業進太妃文宣將受魏禪后固執不許之天保初尊為皇太后宮曰宣訓濟南即位尊為太皇太后尚書令楊愔等受遺詔輔

政踈忌諸王太皇太后密與孝昭定策誅之下令廢立孝昭即位復為皇太后孝昭崩下詔立武成大寧二年春太后寢疾四月辛丑崩於北宮年六十二五月甲申葬義平陵太后凡孕六男二女皆感夢孕文襄夢一斷龍孕文宣夢大龍首尾屬天地張口動目勢狀驚人孕孝昭夢蠕龍於地孕武成夢龍浴於海魏二后則夢月入懷孕襄城博陵二王又夢鼠入衣下后未崩有童謠曰九龍母死不作孝及后崩武成時服緋袍如故未幾登三臺置酒作樂宮女進白袍帝怒投諸臺下和士開請止樂

帝大怒搥之帝於昆季次實九蓋其徵也 柔然公主郁久閭
阿那瓌女柔然強盛與西魏通和欲連兵東伐神武病之令杜
弼使柔然為世子求婚阿那瓌曰高王自娶則可神武猶豫尉
景與武明后及文襄並勸請乃從之武定三年使慕容儼往聘
八月神武迎於下館阿那瓌使其弟禿突佳來送女且報聘戒
曰待見外孫返國主性嚴毅一生不肯華言神武當病不得往
主所禿突佳怒恚神武自射堂輿疾以就主神武崩文襄從柔
然國法蒸主產一女 上黨太妃韓氏執之妹神武儼時欲聘

之軌母不許及神武貴韓氏夫已死乃納之 馮翊太妃鄭氏名大車嚴祖妹初為魏廣平王妃遷鄴後神武納之寵冠後庭生馮翊王潤神武征劉蠡升文襄蒸於大車神武還一婢告之二婢為證神武杖文襄一百幽之武明后亦見隔絕時彭城爾朱太妃有寵生子淑神武有廢立意文襄求救於司馬子如子如來朝偽為不知者請武明后神武告其故子如曰消難亦姦子如妾如此事正可覆蓋妃是王結髮婦常以父母家財奉王

王在懷朔被杖背完皮妃晝夜供給視瘡後避葛賊同
走并州貧困燃馬屎自作靴思義何可忘夫婦相宜女
配至尊男承大業又妻領軍勲何宜搖動一女子如草
芥况婢言不必信神武因使子如鞠之子如見文襄尤
之曰男兒何意畏威自誣因反二婢辭脅使自縊乃啓
神武曰果虛言神武大悅召后及文襄后遙見神武一
步一叩頭文襄且拜且進父子夫妻相泣如初

愚按歡非為子如欺也糟糠不可棄棄則教薄豕嗣

不可黜黜則府爭歡非為子如欺乃自欺耳無自欺
真儒而巧自欺奸雄

神武乃置酒曰全我父子者司馬子如賜黃金百三十
斤文襄贈良馬五十疋高陽太妃游氏父京之為相
州長史神武剋鄴欲納之京之不許遂牽曳取之京之
尋死游氏於諸太妃中最有德訓諸王公主婚嫁常令
主之馮娘者子昂妹也初為魏任城王妃適爾朱世隆
神武納之生浮陽公主李娘者廷實妹初為城陽王妃

並早卒不為太妃

文襄敬皇后元氏魏孝靜帝妹孝武時封馮翊公主歸於文襄容德兼美曲盡和敬初生河間王孝琬時文襄為世子三日孝靜幸世子第贈錦綵及布帛萬匹世子辭求通受諸貴禮遺於是十屋皆滿次生兩公主文宣受禪尊為文襄皇后居靜德宮及保天六年文宣漸致昏狂乃移居高陽之宅而取其府庫曰吾兄昔為我婦我今須報乃淫於后其高氏女婦無親疎皆使左右亂

交之於前以葛為絙令魏安德主騎上使人推引之又命胡人苦辱之帝又自呈露以示羣下

朱敬則文宣論有云或醫行罵衆僚或擘尻示羣下蓋指此

武平中后崩祔葬義平陵 瑯琊公主名玉儀魏高陽王斌庶生妹初不見齒為孫騰妓騰又放棄文襄遇諸途悅而納之遂被殊寵奏魏孝靜封焉文襄謂崔季舒曰爾由求為我求色不如我自得一絕異者崔暹必當

造我直諫我亦有以待之及暹諸事文襄不復段以顏色居三日暹懷刺墜於前文襄問何用此為暹悚然曰未得通公主文襄大悅把暹臂入見季舒語人曰崔暹常念吾佞在大將軍前每言叔父合殺及其自作體佞乃過於吾玉儀同產姊靜儀先適黃門郎崔括文襄亦幸之皆封公主括父子由是超授賞賜甚厚

文宣皇后李氏諱祖娥趙郡李希宗女容德甚美初為太原公夫人及帝將建中宮高隆之高德正言漢婦人

不可母天下宜更擇美配楊愔固請依漢魏故事不改
元妃而德正猶固請廢后立段昭儀欲結勳貴援帝不
從乃立后帝好捷嬪御至有殺戮者唯后獨蒙禮敬天
保十年改為可賀敦皇后孝昭即位降居昭信宮號昭
信皇后武成踐阼逼后淫亂云若不許我當殺爾兒后
懼從之後有娠太原王紹德至閤不得見愔曰兒豈不
知耶姊姊腹大故不見兒后聞之大慙由是生女不舉
帝橫刀詬曰爾殺我女我何殺爾兒對后前以刀鐮築

殺紹德后大哭帝愈怒裸后亂搗之號天不已盛以絹囊流血淋漓投諸渠水良久乃蘇犢車載送妙勝尼寺后性愛佛法因此為尼齊亡入闕隋時得還

趙郡段昭儀韶妹也婚夕韶妻元氏為俗弄女壻法戲文宣文宣銜之後因發怒謂曰我會殺爾婦元氏懼匿婁太后家終文宣世不敢出昭儀才色兼美禮遇殆同正嫡後王時改適錄尚書唐邕王嬪者瑯琊人嬪姊先適崔修文宣並幸之數數降其夫家超用修為尚書

卽薛嬪者本娼家女年十四五時為清明王岳所好其父求內宮中大被寵其姊亦進御文宣後知先與岳通又為其父乞司徒公大怒先鋸殺其姊薛嬪當時有娠過產亦從戮廢帝李皇后文宣皇后之弟女父祖勲後歷殿中尚書孝昭皇后元氏開府元蠻女初為常山王妃

北齊書曰天保時文宣以後故魏宗室欲帝離之陰為廣求淑媛欲移其寵帝雖承旨有納而情義彌重

天保末賜姓步六孤氏及孝昭即位立為皇后帝崩從
梓宮之鄴始度汾橋武成聞后有奇藥追索不得使閹
人就車頓辱降居順成宮武成既殺后子樂陵王后被
閹隔不得與家相知忽宮內有飛語帝令檢推得后父
兄書信蠻生免官后以齊亡入周氏宮隋文帝作相放
還山東

武成皇后胡氏安定胡廷之女母范陽盧道約女也初
懷孕有胡僧詣門曰此宅瓠蘆中有月既而生后天保

初為長廣王妃產後主日有鷄鳴產帳上武成崩尊為
皇太后陸媪及和士開密謀殺趙郡王劼出婁定遠元
文暹為刺史並詔事太后初武成時后與諸閹蔡狎武
成寵幸和士開每與后握槩因此與后姦自武成崩後
數出詣佛寺又與沙門曇獻通布金錢於獻席又挂寶
裝胡床於獻屋壁武成平生所御也乃置百僧內殿託
以聽講日夜與曇獻寢處以獻為昭玄統僧徒暹指太
后獻曇獻謂為太上皇帝聞太后不謹未之信後朝太

后見二少尼悅而召之乃男子也於是曇獻事亦發皆
伏法并殺元山王三郡君皆太后所昵也帝自晉陽奉
太后還鄴至紫陌卒遇大風舍人魏僧伽明風角奏即
時當有暴逆事帝詐云鄴中有急彎弓纏稍馳入南城
令鄧長顓幽太后北宮仍敕內外諸親不得相見久之
帝迎復太后太后初聞使至大驚慮有不測每太后設
食帝亦不敢嘗周使元偉來聘作述行賦叙鄭莊公剋
段遷姜氏文雖不工當時深以為愧齊亡入周恣行姦

穢開皇中死 宏德夫人李氏趙郡李叔讓女初為魏
孝靜嬪武成納焉

是魏孝靜出宮時咏陳思王詩之趙國李嬪即可嘆
生南陽王仁盛為太妃姊為南安王思妃坐夫反焚死
太妃間之發狂薨 文宣王嬪及中人盧勒义妹武成
並以為嬪武成崩後胡后令二嬪自殺二嬪悲哭後主
為惻愴私遺衣物令出外避焉盧養淮南王後為太妃
又有馬嬪亦得幸為后所妬自縊死彭樂任祥並有女

因坐父兄事皆入宮為文宣所幸武成以彭為夫人養
齊安王任生丹楊王並為太妃

愚按高歡父子兄弟內亂穢甚於元令人思歡納兩
爾朱后事

後主皇后斛律氏左丞相光女初為皇太子妃後主受
禪立為皇后武平三年正月生女帝欲悅光詐稱生男
為大赦光遇害后廢在別宮後令為尼齊滅嫁開府元

仁

元仁魏宗室也今亦納高家一后即當於此着眼

後主皇后胡氏隴東王長仁女胡太后自愧失母儀之道欲求悅後主故飾后宮中令帝見之帝果悅立為宏德夫人進左昭儀大被寵愛斛律后廢陸媪欲以穆夫人代太后不許祖珽請立胡昭儀遂進為皇后既非陸媪勸立又意在穆夫人後於太后前作色曰何物親姪女作如此語太后問何語曰不可道固問之乃誣后語大家云太后行多非法不可以訓太后大怒喚后出立

剔其髮送還家帝思之每致詩通意後與斛律廢后俱
召入內數日鄴不守後亦改嫁

後主皇后穆氏名邪利本斛律后從婢也其母名輕霄
本穆子倫婢轉入侍中宋欽道家姦私生后莫知氏族
或云后即欽道女小字黃花後字舍利欽道婦妬輕霄
黥其面為宋字欽道伏誅黃花因入宮幸於後主宮內
稱為舍利大監女侍中陸媪知其寵養為女薦為宏德
夫人武平元年六月生皇子恒時後主未有儲嗣斛律

后丞相光女也慮其懷恨先令母養之立為皇太子陸以國姓之重穆陸相對又奏賜姓穆氏胡后之廢陸有助焉遂立為皇后大赦初有折衝將軍元正烈於鄴城東水中得璽以獻文曰天皇后璽蓋石氏所作詔書頒告以為后瑞武成為胡后造真珠裙袴所費不可勝計為火所焚後主既立后復營之屬周武遭太后喪詔侍中薛孤康買等往吊又遣商胡齋錦綵三萬疋與弔使同往欲市真珠為后造七寶車周人不與交易然竟造

馬先是童謡曰黃花勢欲落清觴滿杯酌言黃花不久也後主自立穆后昏飲無度故云清觴滿盃酌又詔改陸息駱提婆姓為穆以后故也后既以陸為母提婆為家遂路人視輕霄輕霄後自療面欲求見為陸所禁遏竟不得

隋書五行志曰齊穆后將如晉陽向北宮亂胡太后至宮內門所乘七寶車無故陷入於地牛沒四足是年齊滅后被擄入長安

馮淑妃名小憐大穆后從婢穆后愛哀以五月五日進
之號續命慧黠能彈琵琶工歌舞後主惑之坐同席出
並馬願得死生一處命淑妃處隆基堂妃惡曹昭儀常
居之悉令反易其地周師取平陽帝獵於三堆晉州巫
告急帝將還妃請更殺一圍帝從其言識者以為後主
名締殺圍非吉徵及帝至晉州城已欲沒作地道攻之
城陷十餘步將士乘勢欲入帝敕且止召妃共觀妃粧
點不時至周人以木拒塞城遂不下舊俗相傳晉州城

西石上有聖人跡妃欲往觀帝恐弩矢及橋故抽攻城木造遠橋監作舍人以不速成受罰帝與妃度橋橋壞至夜乃還稱妃有功將立為左皇后即使馳取皇后服御仍與並騎觀戰東偏少却妃怖曰軍敗矣帝遂以妃奔還至洪洞戍妃方粉鏡自玩後亂唱賊至復走內叅自晉陽以皇后褙翟至帝為按轡命妃著之然後去帝奔鄴太后後至帝不出迎妃將至鑿城北門出十里迎之復以妃奔青州後主至長安請周武帝乞妃帝曰朕

視天下如脫屣一老嫗豈與公惜也仍賜之

三國典畧曰初武成殂後有童謠曰千錢置果園中有芙蓉樹破券不分明蓮子隨他去調甚悲苦至是乃應時妃名小憐故也

及帝遇害以賜代王達甚嬖之妃彈琵琶因斷絃作詩曰雖蒙今日寵猶憶昔時憐欲知心斷絕應看膝上絃達妃為妃所譖幾致於死隋文帝以賜達妃况奪諡令著布裙配春詢母逼令自殺

隋書五行志曰齊亡後后妃貧者至賣燭為業

後主以李祖欽女為左昭儀進為左娥英裴氏為右娥英娥英者取舜妃娥皇女英其名陽休之所制樂人曹僧奴進二女大者忤旨剝面皮少者彈琵琶為昭儀封僧奴曰南王僧奴死又貴其兄弟妙達等二人同日皆封郡王為昭儀別起隆基堂甚綺麗陸媪誣以左道殺之又有董昭儀毛夫人彭夫人王夫人小王夫人二李夫人皆寵毛能彈箏本和士開薦幸者彭以音妓進卒

於晉陽為造佛寺與總持相埒一李是隸戶女以五絃
進一女即孝貞女小王生一男諸閹人在傍皆蒙賜給
毛兄思安超登武衛董父賢義亦作軍主田昭儀父亦
超登開府自餘姻屬多至大官

周文皇后元氏魏孝武妹初封平原公主

按本史張欣傳即張歡傳稱平陽公主時平原公主
從孝武入關無兩平原理宜從欣傳

適開府張歡歡性貪殘遇后無禮后怒愬帝殺歡改封

后馮翊公主以配周文帝生孝閔魏大統十七年薨恭
帝三年十一月合葬成陵孝閔踐阼追尊為王后武成
初又追尊為皇后

文宣皇后叱奴

內入諸姓叱奴氏魏孝文改狼氏西魏時復舊

代人周文帝為丞相納為姬生武帝天和三年六月尊
為皇太后建德三年三月崩五月葬永固陵

孝閔皇后元氏名胡摩魏文帝第五女初封晉安公主

帝為畧陽公尚馬及踐阼立為王后帝被廢后為尼建
德初武帝誅晉公護上帝尊號以后為孝閔皇后居崇
義宮隋革命後出居里第大業十二年崩

明敬皇后獨孤氏

內入諸姓獨孤氏孝文改劉氏後周隋唐時又復舊
太保衛公信長女帝在藩納為夫人二年正月立為王
后四月崩葬昭陵武成初追崇為皇后明帝崩與后合
葬

獨異志曰信三女生三天子長生周武帝次生隋煬
帝三生唐高祖讀此方知長女為明帝后武帝嫂非
母也

武成皇后阿史那氏突厥木杆可汗俟斤之女突厥滅
柔然盡有塞表地志陵中夏周文方與齊人爭衡結為
援俟斤初欲以女配帝既而悔之武帝即位前後累遣
使要結乃許歸后保定五年二月詔陳公純許公宇文
貴神武公竇毅南安公楊符等備皇后文物及行殿并

六宮以下一百二十人至侯斤牙所迎后侯斤又許齊
婚將有異志純等累請不得反命會雷風大起飄壞其
窮廬侯斤以為天譴乃禮送后純等奉以歸天和三年
三月至武帝親迎之后有姿貌善容止帝深敬禮

宋初新唐書竇后傳云武帝以突厥女為后姿陋寵
后時為帝甥女密諫曰吾國未靖虜且強願抑情撫
接以取合從則江南關東不吾梗與此不同

宣帝即位尊為皇太后大象元年二月改天元皇太后

二年二月又尊曰天元上皇太后宣帝崩靜帝尊為太
皇太后隋開皇二年殂年三十二詔有司備禮祔葬后
於孝陵

武皇后李氏名娥姿楚人子謹平江陵后家被籍沒至
長安周文以后賜武帝後得幸生宣帝宣政元年七月
尊為帝太后大象元年二月改為天元帝太后七月又
尊為天皇太后二年二月尊為天元聖皇太后宣帝崩
靜帝尊為太帝太后隋開皇元年三月為尼改名常悲

八年殂以尼禮葬京城南

宣帝后朱氏滿月吳人家坐事沒東宮宣帝為太子后被選掌衣帝召幸之遂生靜帝大象元年四月立為天元帝后七月改為天皇后二年二月又改為天大皇后后本非良家又長帝十餘歲踈賤無寵以靜帝故特尊崇之班亞揚后宣帝崩靜帝尊后為帝太后隋開皇元年二月為尼改名法淨六年殂以尼禮葬京城南

宣帝后陳氏名月儀自云潁川人大將軍山提第八女

大象元年六月以選入宮拜德妃月餘日立為天左皇后二年二月改天左大皇后二月又詔以坤儀比德土數惟五四大皇后外增置天中大皇后一人以後為天中大皇后帝崩后為尼改名華光唐永徽初終父山提本爾朱兆隸仕齊位特進開府東兗州刺史謝陽王武帝平齊拜大將軍封浙陽公大象元年以後父超授上柱國進鄒國公除太宗伯

宣帝皇后元氏名樂尚河南洛陽人開府晟第二女年

十五被選入宮拜貴妃大象元年七月立為天右皇后
二年二月改天右大皇后帝崩后為尼改名華勝初后
與陳后同時選入宮俱拜為妃及升后又同日受冊寵
遇均等年齒復同特相親愛及為尼後李朱及尉遲后
相繼歿而二后至唐貞觀中尚存后又晟少以元氏宗
室拜開府大象元年七月以后父進上柱國封翼國公
宣帝皇后尉遲氏

內入諸姓尉遲氏孝文改尉氏西魏復舊至唐不改

名繁熾蜀公迴孫女有美色初適杞公亮子西陽公温以宗婦例入朝帝逼幸之及亮謀逆帝誅温追后入宮拜長貴妃大象二年三月立為天右大皇后帝崩后為尼改名華道隋開皇十五年殂

噫魏恭帝若干后不為尼周世乎觀此五尼所謂其則不遠

靜帝司馬皇后名令姬柱國榮陽公消難女大象元年二月宣帝傳位於帝七月納為皇后宣帝命也二年九

月隋王楊堅輔政以后奔陳廢后為庶人後嫁隋司州刺史李丹唐貞觀初猶存

隋文獻皇后獨孤氏諱伽羅河南洛陽人周大司馬衛公信女信見文帝有奇表故以后妻之時年十四帝與后相得誓無異生子后姊周明帝后長女周宣帝后貴戚之盛莫與為此而后每謙卑自守及宣帝崩隋文居禁中總百揆后使李圓通謂席曰騎虎之勢必不得下勉之及受禪立為皇后突厥嘗與中國交市有明珠一

篋價直八百萬幽州總管陰壽白帝市之后曰當今戎
狄屢寇將士罷勞未若以八百萬分賞有功百寮聞而
畢賀文帝甚寵憚之帝每臨朝后輒與帝方輦而進至
閣乃止又使宦官伺帝有失則必匡諫多所宏益帝退
朝乃同反宴寢相顧欣然后早失二親常懷感慕見公
卿有父母者每為致禮有司奏曰周禮周官之妻命於
王后憲章在昔請依古制后曰以婦人與政或從此漸
不可開也不許后每謂諸公主曰周家公主類無婦德

失禮舅姑離薄人骨肉爾等當誡之后姑子都督崔長
仁犯法當斬文帝以后故免之后曰國家之事焉可顧
私長仁竟生死異母弟阼以猫鬼巫蠱詛后坐當死后
三日不食為請命曰阼若蠹政害民不敢言今坐為妾
身敢請其命阼得減死一等后雅性儉約帝嘗合止痢
藥須胡粉一兩因宮內不用求竟不得又欲賜柱國劉
嵩妻織成衣領宮內亦無帝以后不好華麗故齊七寶
車及鏡臺絕巧麗使毀車以鏡臺賜后后雅好讀書識

達今古言事皆興帝意合宮中稱二聖后兄女夫死於并州后嫂以女有娠請不赴葬后曰婦人事夫何容不往其姑在宜自諂之姑不許女遂行后頗仁愛每聞大理決囚未嘗不流涕然性妬後宮莫敢進御尉遲迥女孫美先在仁壽宮帝見而悅之得幸后伺帝聽朝陰殺之帝大怒單騎從苑中出不由徑路入山谷間三十餘里高顛揚素等追及扣馬諫帝太息曰吾貴為天子不得自由顛曰陛下豈以一婦人輕天下耶意少解駐馬

良久夜方還宮后候於閣內及帝至流涕拜謝頰素等
和解之帝置酒極歡后自此意頗折初后以頰是父家
客甚見親禮至是聞頰謂已為一婦人因銜恨又以頰
夫人死其妾生男益不善漸加譖毀帝亦唯后言是用
后見諸王及朝士有妾孕者必勸帝斥之時皇太子多
內寵妃元氏暴薨后意太子愛妾雲氏害之由是諷帝
黜頰竟廢太子立晉王廣皆后謀也仁壽二年八月甲
子日暈四重已巳太白犯軒轅其夜后崩於永安宮年

五十九葬太陵后崩後宣華夫人陳氏華容夫人蔡氏
俱寵帝頗惑之由是發疾及危篤謂侍者曰使皇后在
吾不及此 宣華夫人陳氏陳宣帝女性聰慧姿貌無
雙陳滅配掖庭後選入宮為時獨孤后妬後宮罕得進
御唯陳氏有寵煬帝在藩陰有奪宗計規為內助每致
禮焉進金蛇金駝等物以取媚陳氏皇太子廢立頗有
力焉及后崩進貴人專房擅寵主斷內事六宮莫比帝
大漸遺詔拜為宣華夫人初帝寢疾仁壽宮夫人與太

子同視疾平旦出更衣為太子所逼拒之得免歸於帝所帝怪其神色有異問之夫人泣然曰太子無禮

趙毅大業畧記以陳夫人為蔡夫人當從隋書

帝恚抵牾曰畜生何堪付大事獨孤誤我意謂文獻后也因呼兵部尚書柳述黃門侍郎元巖曰呼我兒述等呼太子帝曰勇也述巖出閣為敕訖示左僕射楊素素白太子太子遣張衡入寢殿令夫人及後宮同侍疾者並就別室俄聞帝崩未發喪夫人與諸後宮相顧曰事

變矣皆色動股慄晡後太子遣使者齋金合帖紙於際
親署封字以賜夫人夫人見之惶懼疑為鳩也不敢發
使者促之乃發見合中有同心結數枚諸宮人相謂曰
得免死矣夫人恚而却坐不肯致謝諸宮人共逼之乃
拜使者其夜太子蒸馬煬帝即位出居仙都宮尋召入
歲餘終年二十九帝深悼之為製神傷賦 容華夫人
蔡氏丹陽人陳滅選入宮為世婦容儀婉嫵帝甚悅之
以文獻后故希得進幸后崩後漸見寵拜為貴人叅斷

宮掖亞於陳氏帝寢疾加號容華夫人帝崩後自請見
煬帝言事亦為帝所蒸

煬帝愍皇后蕭氏梁孝明帝女江南風俗二月生子者
不舉后以二月生季父爰收養之未幾爰夫妻俱死轉
養舅張軻家軻甚貧后躬親勞苦煬帝為晉王文帝選
妃於梁卜諸女皆不吉梁明乃迎后舅氏令使者占之
吉遂冊為妃后性婉順有智識好學解屬文頗知占候
文帝大善之煬帝甚寵敬焉及嗣位立為皇后帝每遊

幸未嘗不從時后見帝失德心知不可不敢措言因為
述志賦自寄其詞曰承積善之餘慶備箕箒於皇庭恐
脩名之不立將負累於先靈迺夙夜而匪懈實寅懼於
玄冥雖自強而不息亮愚蒙之多滯思竭節於天衢才
追心而弗逮實庸薄之多幸荷隆寵之嘉惠賴天高而
地厚屬王道之昇平均二儀之覆載與日月而齊明賴
春生而夏長等品物而同榮願立志於恭儉私自兢於
誠盈孰有念於知足苟無希於濫名惟至德之宏深情

弗適於聲色感懷舊之餘思求故劍於宸極叨不世之
殊明謬非才而未職何寵祿之踰分撫胸襟而未識雖
沐浴於恩光內慙惶而累息顧微躬之寡昧思令淑之
良難實不遑於啟處將有情而自安若臨深而履薄心
戰慄其如寒夫居高而必危每處滿而防溢知恣夸之
非道乃攝生於沖謚嗟寵辱之易驚尚無為而抱一履
謙光而守志且願安乎容膝珠簾玉箔之奇金屋瑤臺
之美雖時俗之崇麗蓋哲之所鄙愧締紘之不工豈絲

竹而喧耳知道德之可尊明善惡之由已蕩囂煩之俗
慮乃服膺於經史綜箴誠以訓心觀女圖而作軌遵古
賢之令範冀福祿之能綏時循躬而三省覺今是而昨
非嗟黃老之損思信為善之可歸慕周姒之遺風美虞
妃之聖則仰先哲之高才慕至人之休德質菲薄而難
蹤心恬愉而去惑乃平生之耿介實禮義之所遵雖生
知之不敏庶積行以成仁懼達人之蓋寡謂何求而自
陳誠素志之難寫同絕筆於獲麟及帝幸江都臣下離

貳

資治通鑑曰帝自曉占候卜相好為吳語嘗夜置酒
仰視天文謂后曰外間大有人圖儂然儂不失為長
城公卿不失為沈后且共樂飲耳因飲滿沉醉又嘗
引鏡自照顧后曰好頭頸誰當斫之后驚問則笑曰
貴賤苦樂更迭為之亦復何傷

有宮人白后曰外間人人欲反后曰任汝奏之宮人言
於帝帝大怒曰非汝宜言斬之後宮人復白后曰宿衛

者往往偶語謀反后曰天下事一朝至此已無可救何
用言之徒令帝憂煩耳自是無復言者及宇文文化及之
亂隨軍至聊城化及敗沒於竇建德建德妻曹氏妬悍
煬帝妃嬪美人並使出家并后置於武強縣是時突厥
處羅可汗方盛其可賀敦即隋義公主也遣使迎后建
德不敢留遂携其孫正道及諸女入虜庭唐貞觀四年
破突厥皆以禮致之歸京師賜宅興道里二十一年崩
詔以后禮合葬於揚州煬帝陵謚曰愍

別記載侯夫人事夫人色美入宮不得進御一日自
經棟下臂懸錦囊中有文左右取以進帝乃詩也內
自感三首與自傷一首尤為悽婉帝見之反覆傷感
往視其尸猶潔美如生乃責中使許廷輔不選入迷
樓罪賜自盡厚葬夫人帝酷好其詩誦不去口命樂
府歌之 東恭帝母劉氏孝成皇帝良姊也帝即位
尊為皇太后王世充專政加號聖感皇太后後不知
所終西恭帝母章妃無考

論曰男女正位人倫大綱三代以還遠於漢晉何嘗不
敗於矯誣而興於聖淑至於后稷稟靈巨迹神元生自
天女克昌來葉異世同符此後諸婦無足論者文明邪
險幸不墜國靈后淫恣卒亡天下傾城之誠其在茲乎
若乙后迫於畏逼有足傷矣昔鈞弋年少子幼漢武所
以行權魏世遂為常制子貴母必死矯枉不亦過乎孝
文終革其失良有以也神武明追蹤周亂後主敗家馮
妃此跡褒后汙隆之義蓋有係焉周氏粵自文皇逮乎

武帝年踰二紀世歷四君業非草昧之辰事殊權宜之日乃棄同即異自我作古既而報者倦矣施者無厭向所謂和親未幾已成讎敵竒正之道有異於斯歷觀前載以外戚而居宰輔者多矣而傾漢室者王族喪周家者楊氏何滅亡之禍若合符焉隋文取鑒已往大革前失故母后之家不罹禍敗獨孤權無呂霍獲全仁壽之前蕭氏勢異梁竇不傾大業之後

隋書曰蕭后初歸藩邸有輔佐君子之心煬帝得不

以道便謂人無忠信父子之間尚懷猜阻夫婦之際
其何有焉暨乎國破家亡竄身無地飄流異域惜哉
或不隕舊基或更隆克構豈非處之以道所致然乎

南北史合注卷一百